

Na osnovu Odluke Predsjedništva Bosne i Hercegovine, broj: 01-50-1-2516-37/20, od 27. augusta 2020. godine, usvojene na 15. redovnoj sjednici Predsjedništva, održanoj 27. augusta 2020. godine, te Zaključka Predsjedništva Bosne i Hercegovine, broj: 01-50-1-3420-10/20 od 19. novembra 2020. godine, usvojenog na 18. redovnoj sjednici Predsjedništva, održanoj 19. novembra 2020. godine, a u skladu sa Odlukom Predsjedništva Bosne i Hercegovine o postupku kandidovanja i imenovanja predstavnika Bosne i Hercegovine u međunarodnim organizacijama i institucijama („Službeni glasnik BiH“, broj 30/13), Ministarstvo vanjskih poslova Bosne i Hercegovine objavljuje

J A V N I O G L A S

za izbor kandidata za poziciju sudije u ime Bosne i Hercegovine u Evropskom sudu za ljudska prava (ECHR)

Evropski sud za ljudska prava ustanovljen je Evropskom konvencijom za zaštitu ljudskih prava i osnovnih sloboda iz 1950. godine i kao sudska institucija za zaštitu prava i sloboda djeluje od 1959. godine u okviru najstarije evropske organizacije, Vijeća Europe.

Sud je stupanjem na snagu Protokola 11. Evropske konvencije o zaštiti ljudskih prava i osnovnih sloboda, dana 1. novembra 1998. godine, postao stalna institucija zaštite ljudskih prava u Evropi.

Sjedište Evropskog suda za ljudska prava je u Strasbourgu, u Republici Francuskoj, a službeni jezici Suda su engleski i francuski jezik. Pravila postupka pred Sudom regulisana su Poslovníkom Suda i Konvencijom.

Bosna i Hercegovina je ratificirala Konvenciju dana 12.07.2002. godine i tim činom je prihvatila nadležnost Evropskog suda za ljudska prava da odlučuje o aplikacijama/zahtjevima bilo koje fizičke osobe, nevladine organizacije, skupine pojedinaca ili druge države članice koji tvrde da su žrtve povrede prava utvrđenih u Konvenciji što ih je počinila Bosna i Hercegovina.

Pozivaju se svi zainteresovani kandidati da se prijave za nominaciju za poziciju sudije u ime Bosne i Hercegovine u Evropskom sudu za ljudska prava sa sjedištem u Strasbourgu.

Sudije u Evropskom sudu za ljudska prava imenuju se na mandat od devet godina, bez mogućnosti obnavljanja mandata.

Sudija je dužan da se penzionise ukoliko u toku mandata navrší 70 godina.

Podnosilac prijave treba ispunjavati sljedeće uslove:

- Da je državljanin Bosne i Hercegovine;
- Da posjeduje visoko stručno obrazovanje – završen Pravni fakultet;
- Kandidat, u skladu sa članom 21. Evropske konvencije o ljudskim pravima i osnovnim slobodama, mora imati visoki moralni ugled, te mora posjedovati ili kvalifikacije potrebne za obavljanje visokih sudskih funkcija ili biti osoba priznate stručnosti u oblasti unutrašnjeg ili međunarodnog prava;
- Da posjeduje radno iskustvo u oblasti zaštite ljudskih prava i osnovnih sloboda, razvoja demokratije i vladavine prava;
- Kandidati moraju aktivno poznavati jedan od službenih jezika Vijeća Evrope i posjedovati pasivno poznavanje drugog službenog jezika (službeni jezici: engleski i francuski);
- Da ne obavlja rukovodeću dužnost u organima Bosne i Hercegovine;
- Da nije kažnjavan, osuđivan i da se protiv njega ne vodi krivični postupak;
- Da se na kandidata ne odnosi član IX. 1. Ustava Bosne i Hercegovine.

Uz svojeručno potpisanu prijavu je potrebno dostaviti dokumente (ovjerene kopije):

- Biografiju na jednom od službenih jezika Bosne i Hercegovine;
- Biografiju na jednom od službenih jezika Vijeća Evrope;
- Univerzitetske diplome (nostrifikovane/priznate diplome, ukoliko fakultet nije završen u BiH ili je diploma stečena u nekoj drugoj državi nakon 06.04.1992. godine);
- Dodatak diplome za kandidate koji su visoko obrazovanje stekli po Bolonjskom sistemu studiranja; iznimno, samo u slučaju da visokoškolska ustanova dodatak diplomi nije uopšte izdala, niti za jednog diplomca, kandidat je dužan da uz ovjerenu kopiju univerzitetske diplome dostavi uvjerenje visokoškolske ustanove da dodatak diplomi nije uopšte izdat, niti za jednog diplomca;
- Dokaz o radnom iskustvu u oblasti zaštite ljudskih prava i osnovnih sloboda, razvoja demokratije i vladavine prava;
- Uvjerenje o aktivnom znanju engleskog ili francuskog jezika;
- Uvjerenje o aktivnom ili pasivnom znanju drugog jezika;
- Uvjerenje o državljanstvu (ne starije od 6 mjeseci od dana izdavanja od strane nadležnog organa);
- Uvjerenje o nekažnjavanju i krivičnom gonjenju, ne starije od 6 mjeseci.

Obrazac CV (biografije) na engleskom, francuskom i na jednom od službenih jezika Bosne i Hercegovine može se preuzeti na web stranici Ministarstva vanjskih poslova BiH:

http://www.mvp.gov.ba/vanjska_politika_bih/multilateralni_odnosi/zaposlenje_u_medjunarodnim_organizacijama/?id=168.

Komisija Ministarstva vanjskih poslova Bosne i Hercegovine, imenovana za prikupljanje i pregled dostavljenih prijava, će razmotriti pristigle prijave kandidata u smislu ispunjavanja opštih i posebnih propisanih uslova, te sačiniti izvještaj koji će uz zaprimljene prijave, sa kompletnom traženom dokumentacijom, biti dostavljen Predsjedništvu Bosne i Hercegovine na dalje postupanje.

Predsjedništvo Bosne i Hercegovine, u skladu sa svojim ustavnim ovlaštenjima, vrši odabir liste kandidata iz Bosne i Hercegovine, te predlaže tri kandidata za njihovu nominaciju za poziciju sudije u ime Bosne i Hercegovine u Evropskom sudu za ljudska prava (ECHR).

Procedura predlaganja liste od tri kandidata je striktna i obavezujuća, te u potpunosti mora odgovarati smjernicama Komiteta ministara i Parlamentarne skupštine Vijeća Evrope definisanim Memorandumom o proceduri za izbor sudije pri Evropskom sudu za ljudska prava.

Konačnu odluku o imenovanju sudije u ime Bosne i Hercegovine u Evropskom sudu za ljudska prava donosi Parlamentarna skupština Vijeća Evrope, nakon razmatranja dostavljene liste predloženih kandidata od strane Specijaliziranog panela nezavisnih eksperata uspostavljenog od strane Komiteta ministara Vijeća Evrope.

Rok za podnošenje prijava je petnaest dana od dana objavljivanja Javnog oglasa u javnim glasilima.

Sva tražena dokumenta, trebaju biti dostavljena putem poštanske službe preporučenom pošiljkom na adresu:

**Ministarstvo vanjskih poslova Bosne i Hercegovine
sa naznakom: «Javni oglas za izbor kandidata za poziciju sudije u ime
Bosne i Hercegovine u Evropskom sudu za ljudska prava (ECHR)»
71000 Sarajevo, Musala 2.**

Ispunjavanje uslova utvrđenih ovim javnim oglasom računa se danom predaje prijave.

Nepotpune, neblagovremene i neuredne prijave, prijave kandidata koji ne ispunjavaju uslove ovog javnog oglasa, kao i kopije tražene dokumentacije koje nisu ovjerene, neće se uzimati u razmatranje.